

武林掌故叢編

西湖遊覽志卷九

錢唐田汝成叔禾撰

北山勝蹟

葛嶺之西爲履泰山棲霞嶺桃溪棲霞洞紫雲洞牛
皐墓妙智庵

棲霞嶺上桃花爛燦色如凝霞其北有古劒關蓋
左寶雲右仙姑兩山夾峙若劒門然宋立巡司
于此有水一道名桃溪經岳墳前入湖嶺西爲
烏石塢

棲霞洞在妙智庵左地多怪石隱翳榛莽中賈似

道望而異之命施畚畚倏見奇邃乃抉藏剔幽
爲亭曰暢曰瀹俗入其中穹然如夏屋雙石相
倚爲門閤風從南來淅淅而出寒骨淒神不可
久竚故暑遊最勝石壁小臺突然坎中衡二石
下達於坻仰視左竇四五通明大者圓徑丈許
有水洞深不可測頃者惡僧以遊人之多塞兌
垢徑僅餘丈尺耳

紫雲洞在嶺巔去妙智庵數百步許倚空如懸陰
涼徹骨

牛臯墓在劔門關畔臯字伯遠汝州魯山人爲岳

武穆部將累立戰功轉寧國軍承宣使紹興十七年上巳日都統制田師中大會諸將臯遇毒亟歸語所親曰臯年六十一官至侍從卽死無恨所恨者南北通和不以馬革裹屍顧死牖下耳明日卒或言秦檜使師中毒臯云景定初追封輔文侯

妙智庵卽牛臯香火院嶺北有金鼓洞昔人伐石其間聞金鼓下作乃止

嶺下有處士仇仁近員外郎張光弼墓並廢仁近名遠錢唐人宋咸淳名士宋亡落魄江湖元

初辟溧陽州學正未幾隱去工詩文所著有山村集洪武初祠於府學鄉賢祠錢思復挽詩詩窮八十年江海正淒然玉塵風生頰青山雪滿巔門牆張籍俊墓表孟郊賢出處人皆識哀歌徹九泉張仲舉詩前輩彫零盡南陽有古阡詩應傳四海酒不到黃泉槐國真成夢桃園亦是仙松根一掬淚慘淡墮風烟 張光弼廬陵人仕元爲浙省左司員外郎罷官居花市遨遊湖山累月不返有詩名所著有左司集其詩云但教懷抱能傾倒莫向尊罍計有無不爲訪僧三

竺寺肯乘烟艇過西湖酒館湖船盡有名玉杯
時得肆閒情至今人說張員外不是看花不入

城

嶺下爲岳武穆王墓翊忠祠分屍檜流芳亭

岳武穆王墓王名飛字鵬舉相州湯陰人少負氣
節沈毅寡言有神力未冠挽弓三百觔弩八石
宋高宗時以戰伐功厯官都統屢陳恢復大計
高宗慮欽宗之返而攘已也陽獎而陰憾之丞
相秦檜揣知帝旨遂力主和議會兀朮寇拱亳
詔飛往援金人大敗追及朱仙鎮中原響應謂

其部下曰直抵黃龍與諸君痛飲耳方指日渡河而檜欲割淮以北棄之仍詔張俊楊沂中先歸言飛孤軍不可久留以金牌十二召之班師飛憤惋泣東向拜曰十年之力壞于一旦矣明年兀朮寇淮西張俊畏敵不敢進詔飛往援兀朮遁俊忌之飛遂力請解兵柄會兀朮遺檜書言飛不死和議終不成檜乃諷臺臣何鑄羅汝楫等交章論飛言金人攻淮西飛至舒蘄而不進與張俊按兵淮上又欲棄山陽而不守張俊又劫王俊誣飛令張憲岳雲通書協謀翼以兵

柄還飛檜遣使捕飛父子下獄令諫議大夫万俟卨成之會歲暮獄無佐證檜一日獨居書室食柑玩皮若有思者其妻王氏窺笑曰老漢一何無決擒虎易縱虎難也檜犁然當心致片紙獄中卽日報飛死矣蓋摺殺之年三十九雲憲皆棄市獄卒隗順負飛屍踰城至九曲叢祠潛瘞之以玉環殉樹雙橘識焉紹興末金人益猖獗太學生程宏圖訟飛冤詔還飛宗屬徙邊者孝宗詔復飛官諡武穆改葬於棲霞嶺雲祔其傍廢智果院爲祠賜額曰褒忠衍福寺墓上

之木皆南向蓋英靈之感也嘉定四年封鄂王
宋亡寺廢王之六世孫在江州者名士迪與宜
興岳氏通譜合力起之未幾復廢至元間天台
僧可觀者訴于官鄭明德爲作疏語云竊念故
宋贈太師武穆岳鄂王忠孝絕人功名蓋世方
畧如霍嫖姚不逢漢武徒結志於忘家意氣如
祖豫州乃遇晉元空誓言於擊楫賜墓田棲霞
嶺下建祀祠秋水觀西落日鼓鐘長爲聲冤於
草木空山香火猶將薦爽於淵泉豈期破蕩子
孫盡壞久長規制典祀田墮佛宇春秋無所烝

嘗塞墓道毀神棲風雨遂頽廟貌鴝鵒夜啼拱
木躑躅春開斷垣淚落路人事闕世教蓋忠臣
烈士每詔條有致祭之文豈狂子野僧攬國典
出募緣之疏望明有司告之臺省冀聖天子錫
之珪璋褒忠義在天之靈激死生爲臣之勸周
武封比干墓事著遺經唐宗建白起祠恩覃異
代疏成杭州經歷李全慨然重興之廟塑王像
以其子雲雷震霖霆附焉後作燕寢像王父母
及王夫人與王之女號銀瓶娘子者尋毀雲飛
養子也每立奇功飛輒隱之能握鐵椎重八十

斤死年二十三霖子珂嘉定間作籲天辯誣錄
天定錄程史金陀粹編飛事愈白廟中有石刻
飛詩詞二首送紫巖張先生北伐詩云號令風
霆迅天聲動北陬長驅渡河洛直擣向燕幽馬
蹀閼氏血旗梟可汗頭歸來報明主恢復舊神
州其詞云怒髮衝冠凭欄處瀟瀟雨歇擡望眼
仰天長嘯壯懷激烈三十功名塵與土八千里
路雲和月莫等閒白了少年頭空悲切靖康恥
猶未雪臣子恨何時滅駕長車踏破賀蘭山缺
壯志饑餐胡虜肉笑談渴飲匈奴血待從頭收

拾舊山河朝天闕皇明初勅建其祠有司春秋
致祭弘治間參政周木得其裔孫於衢州召令
世守之太監麥秀重建殿寢雲所用鐵鎗猶存
正德八年都指揮李隆鑄銅爲秦檜王氏万俟
卨三像反接跪露臺十二年太監王堂塑王父
母妻子女諸像扁曰一門忠孝古今弔其墓者
詩已成集畧掇其著者葉紹翁詩萬古知心只
老天英雄堪恨復堪憐如公少緩須臾死此虜
安能八十年漠漠凝塵空偃月堂堂遺像在淩
烟早知埋骨西湖路悔不鴟夷理釣船 林弓

寮詩天意只如此將軍足可傷忠無身報主冤
有骨封王苔雨樓牆暗花風廟路香沈思百年
事揮淚對斜陽 趙子昂詩岳王墳上草離離
秋日荒涼石獸危南渡君臣輕社稷中原父老
望旌旗英雄已死嗟何及天下中分遂不支莫
向西湖歌此曲水光山色不勝悲 高則誠詩
莫向中原歎黍離英雄生死繫安危內庭忽下
班師詔絕漠全收大將旗父子一門甘伏節山
河萬里竟分支孤臣尙有埋身地二帝遊魂更
可悲 潘子素詩海門寒日澹無輝偃月堂深

畫漏遲萬竈貔貅江上老兩宮環珮夢中歸內
園羯鼓催花發小殿珠簾看雪飛不道帳前胡
旋舞有人行酒著青衣林清源詩誰收將骨
葬西湖已卜他年必沼吳孤冢有人來下馬六
陵無樹可棲烏廟堂短計慚嫠婦宇宙惟公是
丈夫往事重觀如敗局一龕燈火屬浮屠徐
孟岳詩童大王歸事已離岳將軍死勢尤危直
教萬歲山頭雀去遶黃龍塞上旗飲馬徒聞腥
鞏洛洗兵無復望條支湖邊一把摧殘骨蓋世
功名百世悲高季迪詩大樹無枝向北風千

年遺恨泣英雄班師詔已成三殿射虜書猶說
兩宮每憶尙方誰請劍空嗟高廟自藏弓棲霞
嶺上今回首不見諸陵白露中 陶九成詩精

忠祠宇西湖上再拜荒墳感昔遊斷碣草深蒙
鼉屨空山日落叫鉤輅運移宋祚難恢復帝幸
燕雲困虜囚逆檣陰圖傾大業昭陵無意問神
州偷安甫遂邦家志飲痛甘忘父母讐信使北
和憐屈膝策文南駐忍含羞兩宮五國瞻征幟
丹詔班師下節樓萬里長城直自壤中興武績
遂云休嗚乎竟死姦邪手顛沛誰爲社稷憂黯

黯冤魂遊狴犴紛紛雨淚泣貔貅唯餘滿地萑
弘血不見中流祖逖舟氛堦已塵金匱匿冤旒
終換鐵兜鍪姓名竹帛書千載父子英雄上
丘老樹尙知朝禹穴遺黎總解說王猷復田起
廢憐僧寺移檄褒嘉賴省侯聖世卽今崇祀典
伫看寵渥到松楸

翊忠祠以祀劉允升施全者允升建州布衣士也
聞岳武穆王被逮詣闕上書訟其冤秦檜大怒
下棘寺論死全殿前司小校也憤秦檜主和議
誤國挾刃刺之不中被擒磔於市弘治二年工

部主事莆田林沂建祠祀之四年按察使楊懷
副使吳伯通等重拓大之題其祠曰翊忠

分屍櫓在墓前天順間杭州同知馬偉鋸而植之
首尾異處以示磔屍狀至今猶活前有石壁書
盡忠報國四字每字方五尺餘

流芳亭在墓西有石刻王像存焉其贊曰惟武穆
王天錫勇智氣吞強胡力扶宋季桓桓師旅元
戎是寄行將恢復遭讒所忌生旣無怍死亦何
愧萬古長存惟忠與義

祠之後爲埽帝塢黃龍洞護國仁王禪寺